

Pelajar hilang di tali air ditemukan lemas

Oleh [Asrol Awang](#) - Disember 17, 2023 @ 11:44am

bhnews@bh.com.my



Mayat Mohamad Amirul ditemukan Pasukan Penyelamat Di Air. - Foto BOMBA

KUANTAN: Pelajar tingkatan dua yang hilang ketika mandi di tali air Lorong Indera Sempurna 2, Perkampungan Indera Sempurna, di sini, kelmarin ditemukan lemas, hari ini.

Pegawai Perhubungan Awam Jabatan Bomba dan Penyelamat Malaysia (JBPM) Pahang, Zulfadli Zakaria, berkata mayat Mohamad Amirul Haikal Che Jaapa, 14, ditemukan anggota Pasukan Penyelamat Di Air (PPDA) pada jam 10.22 pagi.

Katanya, mangsa ditemukan di Sungai Air Hitam, kira-kira 1.6 kilometer dari tempat kejadian berhampiran Sekolah Menengah Kebangsaan (SMK) Mat Kilau, di sini.

"Ketika ditemukan, mangsa tersangkut pada pokok.

"Mayat mangsa diserahkan kepada polis dan seterusnya dihantar ke Hospital Tengku Ampuan Afzan (HTAA) untuk tindakan selanjut," katanya.

Dalam kejadian 3.50 petang kelmarin, Mohamad Amirul Haikal, yang juga pelajar SMK Mat Kilau dikhuatiri lemas ketika mandi bersama enam rakannya di tali air itu.

Susulan kejadian itu, operasi mencari dan menyelamat (SAR) digerakkan bersama Jabatan Bomba dan Penyelamat (JBPM), Polis Diraja Malaysia (PDRM) dan Angkatan Pertahanan Awam.